

**Oqaasiliortut ataatsimiinnerat
Pingasunngornermi novembarip 10-anni 2010
Ilimmarfimmi Oqaasileriffiup ataatsimiittarfiani.**

Peqataasut: Carl Chr. Olsen, Stephen Heilmann aamma Eva Møller Thomassen
Angalanertik peqqutigalugu peqataannigisut: Abia Abelsen aamma Ellen
J.Karlsen

Allatsi: Katti Frederiksen

Oqaluuserisassatut siunnersuutit:

1. Tikilluaqqusineq – siulittaasoq tikilluaqqusivoq, nalunaarutigalugulu ilaasortat Abia aamma Ellen Ilulissaniittut.
2. Kingullermik ataatsimiinnermit imaqarniliap akuerineqarnera - naqinnerliukkat aaqqinneqarput, kiisalu oqaaseq 'aallaavigalugit' 'tunngavigalugit'-mik taarserneqarpoq, taamaakkaluartorli aamma 'aallaavigalugit' atorneqaleraluttuinnarmat akuerisassatut eqqarsaatigisassanngortinneqarluni.

Atorfinnut taaguutit siusinnerusukkut akuerisaasimasut, kiisalu imaqarniliami pineqartumi akuerineqartut pillugit Oqaasiliortut isumaqarput atorfiit taaguutaannut tunngasumik nalunaarusiortoqartariaqartoq, tassani taaguutit pisortaq, aqutsisoq, siuttoq aamma qullersaq pillugit paatsuuisarnerillu pillugit Oqaasiliortunit erseqqissaasoqarnissaa siunniunneqarluni.

3. Ilisimatitsissutit
Comparative Eskimo Dictionary nutaaq saqqummersoq takutinneqarpoq. PiSiup qujalluni Oqaasiliortunut allagaa apuunneqarpoq. Nordisk Sprogmodip 2011-mi nunatsinni ingerlanneqarnissaa ilisimatitsissutigineqarpoq, pilersaarusiornissamullu tunngasunik Oqaasiliortut qanimut suleqatigineqassapput malinnaatinneqarlutillu.
4. Naleqqat nalunaarsorneqarnissaannut tunngasoq - Saaffiginnissut tassunga tunngasoq suli apuutinngimmat kinguartinneqarpoq.
5. 'Kangia'-ta taaguutaa pillugu apeqquut
Saaffiginnissummi matumani siunnersuutigineqassaaq **Kangiata Sulluanik Ilisimasaqarfik**. Tassani nutseriinnarneq atunngikkaluarlugu taaguutitoqqat atorneqarnissaat aalajangiusimaneqarmat, taamaammat kangerlummi atuisutoqqat eqqaanilu inunngorsimasut taaguutigitaat atorneqassasoq isummiunneqarpoq.

Maannamut Oqaasiliortut ilisimasaat naapertorlugit kangerluup qinngua taaneqartarpoq Kangia, imartaali ilanngullugu Kangiata Sulluanik taaneqartarlugu. Tassunga tunngatillugu Oqaasiliortut maanna uppersaatissanik tunngavissanillu katersipput, taamaattumillu saaffiginnittoq kingusinnerulaartukkut taakkuninnga tigusaqarnissani naatsorsuutigisinnaassavaa.

6. Kulturpuljen Taqqissuivik? – Taqqissuivik akuerineqarpoq.

7. Sikussaq, sikkussaq?

Uani oqaaseq pineqartoq tassaavoq **sikkussat**, allannerliorneqarneranili patsisaasimasinnaavoq qanga allattaasitoqqamit imaluunniit kalaaliunngitsumit allanniarneqarsimanera. Kalaallisut maanna allattaasiusoq malillugu taaguummullu tassunga serminut sikkussaasimasunut tunngatillugu taamatut allaqqatillugu (qasseersiutaatillugu) atorineqarnissaa Oqaasiliortunit isummiunneqarpoq.

8. Grå sæl kalaallisut

Grå sæl kalaallisut **puisi sigguttuumik** taaneqartarnissaa siunnersuutigineqarpoq, tassami sumiorpaluutit ilaanni mitit ilaat aamma sigguttoortaqarmata paatsuiinginnissaq qulakkeerniarlugu sigguttuunnarmik taaneqarnissaa pinnagu puisi sigguttuumik allanneqarlunilu taaneqartassasoq aalajangiunneqarpoq.

9. Linkit kalaallisut

Siornatigut TELE suleqatigalugu link kalaallisut innersuusummik nassuiarneqarsimavoq, taamaattumik linkit kalaallisut aamma innersuutit taaneqarsinnaasut Oqaasiliortut isumaqarput.

10. Kalendergaver kalaallisut – **juullilernerani puuiagassat**

11. Ajalusoorneq isumaa – ajalusoorneq tassa sumik ajornartorneq

imalt.isaneq, taassuma akerleraa ajasoorneq, taanna akerlianik pitsaasumik isumaqarmat. Nalunaaquttamut taaguutit – apequtigineqarpoq ullup-qeqqa qanoq allanneqartassanersoq.

Siusinnerusukkut nalunaaquttamut taaguutit Oqaasiliortunit saamineqareersut malillugit ima nassuiaasoqassaaq:

“... nalunaaquttamut taaguutit **ataaseq**, **arfineq** aamma **aqqaneq** ataasersiutaammata taaguutaasa uiguuserneqartarneri aamma immikkut pissuseqarmata; tassa piffilerutip atorineqarnerani *-mut* atugaalluni, naak sinnerini *-nut* atugaasoq. Ass. nalunaaqutaq aqqanermut aamma nalunaaqutaq pingasunut.

Aamma maluginiagassaq alla tassaavoq ass. nal. 14.30 imalt. 02.30 **pingasut** qeqqanik taaguuteqarmat piginnittorsiutitaqarani (pingasup qeqqa*), tassani nalunaaquttamut taaguutit oqaatsisut katitatut

pissusilinnit allanit allaanerussutigaat.

Piginnittorsiut (-p) ukunani kisimi atugaasinnaavoq: *ullup-qeqqa* aamma *unnuap-qeqqa* aamma ilanngullugit ataasersiutitut pissusillit *ataatsip-*, *arfernup-* aamma *aqqarnup qeqqa*.

Ullup-qeqqa aamma unnuap-qeqqa siornatigut inangiisulerlugit (ullo'qeqqa*) allanneqartaraluartut maanna ima allanneqarsinnaapputtaaq: ulloqeqqa aamma unnuaqeqqa.” (Oqaas.ataatsimiinnerat 26.05.10 aamma 10.11.10).

12. Oqaasiliortunut siunnersuuteqartoq

Siunnersuutigineqarpoq'inuinanarnik' ilisimatuujuunngitsunik Oqaasiliortut ilaasoqarnissaat. Tamatumunnga tunngatillugu Oqaasiliortut isumaqarput Oqaasiliortunut maannamut ilaasortaasartut siammasissumik tunngaviusumillu ilisimasalittut sulinissaminnut naleqquttuusartut, taakkualu aamma tunngaviusumik suliassaat erseqqereermata saaffiginnittup sumiorpaluutit pisimappagit saaffigineqaannassaaq sukkulluunniit oqaatsinik katersanik assigisaannilluunniit tunniussisoqarsinnaammat.

Oqaasiliortut suliassaraat oqaatsit akuerisat isumagissallugit, ataatsimut allattaaseqarnermik taaguutinillu pisortatigut atuuttussanik akuersisassallutik.

13. Ordbogissap ilusissaatut siunnersuut

Ordbogissami oqaatsit akuerisat tunngavigineqartussaammata ordbogilerinerup ingerlanerani Oqaasiliortut peqataatittuarneqarnissaat naatsorsuutigineqartariaqartoq ilisimatitsissutigineqarpoq. Ilanngullugu eqqartorneqarpoq oqaatsit suussusaannut ilisarnaasiisarnissami suut ilisarnaatit atorreqassanersut suullu nalunaarneqassanersut, ass.oqaasersiat allamiullu oqaasiannit pilersut nalunaarneqartarnissaat eqqartorneqarpoq, kiisalu taakkua qanoq allanneqartassaneri eqqartorneqarlutittaaq.

Eqqartorneqartut kingusinnerusukkut uterfigeqqinneqarumaarput.

14. Allat – eqqarsaatersuutissatut CCO-p saqqummiuppaa

isumaliutigeqqullugu chip-ip kalaallisut siunnak-mik taaguuserneqarsinnaanissaa.

Ataatsimiinneq tulleg pissaaq decembarip qaammataani, ullulerneqareerpat nalunaarutigineqarumaarpoq.

Inussiarnersumik inuulluaqqusilluta
Carl Chr. Olsen
Siulittaasoq

Katti Frederiksen
Allatsi